



BLEKIĆ HAJRO

PRILOG BIOGRAFIJI MOGA BRATA BLEKIĆ ABDESELAMA-ŠANDORA

Abduselam-Šandor rođen je oktobra 1903.godine u Bugojnu, gdje se naš otac Ahmet nalazio u to vrijeme na službi. Otac je bio sudski činovnik, a majka Hanifa rođena Haznadar domaćica. Otac i majka bili su rodom iz Banje Luke. U proljeće 1905.godine otac je premješten u Vargar Vakuf (Mrkonjić Grad), a 1909.godine u Banju Luku. Po povratku u Banju Luku kupio je kuću Muhurdarevića u Pobrđju, gdje je porodica stanovala.

Šandor je u Banjoj Luci pohađjao osnovnu školu, a nastavio i završio u Kotor Varoši, gdje je otac premješten 1914.godine negdje u vrijeme austrougarskog ultimatumu Srbiji. Poslije završetka osnovne škole otac je Šandora upisao u Veliku realku u Banjoj Luci 1915.godine. U Banjoj Luci tada je stanovao kod našeg ujaka Derviša Haznadara. Šandor je pohađjao samo prvi razred gimnazije, ali je prekinuo dalje školovanje. Možda je na to uticao jedan fizički hendikep jer je od djetinjstva mucao. Otac ga je povukao u Kotor Varoš i dao na izučavanje kožarskog zanata kod obučara Hamida Dizdara. Zanat je počeo izučavati koncem 1915.godine. Godinu dana iza toga, 6.decembra 1916.godine, umro nam je otac. Ostala je brojna porodica od 4 dječaka i 6 djevojčica. Dobivena penzija nije omogućavala egzistenciju brojnoj porodici. Zbog toga, početkom 1917.godine ujak Derviš Haznadar i tetak Hamid Kadić, otac Munira Kadića, u želji da pomognu porodici, pozvali su nas da dođemo u Banju Luku. Tako smo se za stalno preselili u Banju Luku. Majka je teško živjela od penzije jer je trebalo prehranjivati brojnu djecu. Naš najstariji brat bio je tada na frontu u Albaniji. U Banjoj Luci stanovali smo tada u kući Marka Livnjakovića u današnjoj ulici Fadila Maglajlića. Niko od rođjaka nije nas mogao primiti u svoju kuću jer niko nije za ovakvu brojnu familiju imao dovoljno mjesta. Zbog toga smo posebno i stanovali.